

嘉慶廬州府志

廬州府志卷二十七

名臣下

夏君祥

薛

祥

孫

申

泰

蔣

綬

孫鎮

孔

立

蕭

敏

程

嘉貞

秦鳳

文

景宗

商

盤

陳

瑄

子銳

龍源

方

正

張

敬

周

璞

丁

毅

子鐫

盧

璟

王

憲

鄭

泰

吳

鎰

李

昂

蔡

瑛

湯

鼎

蘇會

葉

鸞

鄭

時

王

維

沈諲

鮑

德

王

敬

王

恆

秦民悅

郭

鉉

吳

凱

張

淳

周 琥

方 欽

蔚 春

孔 彪

楊 欽

曹 琥

徐 玉

沈 俊

方 渠

吳廷翰

何 珞

岳 倫

方 介

董子策

宛嘉祥

劉 崙

柳希玘

曹 木

秦 寵

蔡 悉

葛振孫

胡 璉

朱來遠

閻 錄

趙元吉

朱萬春

吳光義

龔承先

子萃肅

趙一韓

劉汝佳

徐起元

許如蘭

胡志藩

李 遠

張克佳

賈 彧

張振鸞

吳士講

蔡淑達

任天成

葉士彥

方夢禎

高麟游

王 珩

趙函乙

王綱

王絲

王舟

束士箴

曹同統

張肯穀

夏景耀

朱元徵

吳開允

仰鳳鳴

楊交泰

張名世

吳問啟

弟敏文

朱前詒

李天馥

胡永亨

湯愛鼎

李榮裕

陳大化

廬州府志卷二十七

賜進士出身廬州府知府溫陵張祥雲主修  
名臣下

明

夏君祥字天瑞無爲人元季兵亂以材武信義鄉里推爲城  
主至正己亥明兵至率衆歸附仍奉命協守本州修城繕  
隍調治兵食有姻親坐事當抵法竟編戎伍不少徇陞知  
州

康熙志

薛祥字彥祥無爲人從僉通海來歸渡江爲水寨管軍鎮撫  
數從征有功洪武元年轉漕河南夜半抵蔡河賊驟至祥  
不爲動好語諭散之帝聞大喜以方用兵供億艱授京畿

都轉運便分司淮安濬河築隄自揚達濟數百里徭役均  
平民無怨言有勞者立奏授以官元都下官民南遷道經  
淮安祥多方存恤山陽海州民亂駙馬都尉黃琛捕治誣  
誤甚衆祥會鞠無驗者悉原之治淮八年民相勸爲善及  
考滿還京皆焚香祝其再來或肖像祀之八年授工部尙  
書時造鳳陽宮殿帝坐殿中若有人持兵闕殿脊者太師  
李善長奏諸工匠用厭鎮法帝將盡殺之祥爲分別交替  
不在工者並鐵石匠皆不預活者千數營謹身殿有司列  
中匠爲上匠帝怒其固命棄市祥在側爭曰奏對不實竟  
殺人恐非法得旨用腐刑祥復徐奏曰腐刑廢人矣莫若  
杖而使工帝可之明年改天下行省爲承宣布政司以北

平重地特授祥三年治行稱第一爲胡惟庸所惡坐營建  
擾民謫知嘉興府惟庸誅復召爲工部尙書帝曰讒臣害  
汝何不言對曰臣不知也明年坐累杖死天下哀之子四  
人謫瓊州遂爲瓊山人孫遠正統七年進士景泰時官戶  
部郎中天順元年擢本部右侍郎改工部奉詔塞開封決  
河還仍改戶部成化初督兩廣軍餉位至南京兵部尙書  
以忤汪直免官

明史列傳

申泰無爲人洪武間以薦起家知延平府入覲會諸守有以  
賊敗者傳旨令軍校通提各省知府至延平止得米三升  
鈔二貫考天下清廉第二荷褒賜致仕歸惟攜老蒼頭一  
人步入閭里

江南通志

蔚綬字文璽合肥人洪武中山國子生授戶部主事進員外郎以才能擢山西布政使叅議永樂間召拜禮部侍郎綬秉心淳實履行端方爵秩愈優而恭勤愈著宣德初以禮部尙書致仕卒賜祭葬祀鄉賢

康熙志

孫鎮字希武合肥人洪武中諸生以經明行修卒業太學除戶部主事通敏練達有聲郎署時上以課程事罪部官鎮抗言謂不宜連坐恐傷國體忤旨戍滇南已卯春用廷臣郭資等薦復職應制賦禁柳詩稱旨拜衛輝知府毀淫祠撤浮屠興學課士教民樹畜驅蝗禱雨神率效靈壬午靖難兵起衛輝當南北之衝鎮夙夜防衛堅守不下成祖登極以抗節不附者置之法遣戍山海宣德初御史王紹首



薦赦回除上饒丞不就卒于京邸別號沖元子所著有沖元稿鄭端簡公曉作遜國諸臣列傳備錄其事

康熙志

孔立合肥人洪武初知象山事歸附之初百費未興立秉心廉直庶事以漸修舉時夏蘭秀寇境民甚駭懼遂謀於邑民蔣公直設策馘其渠魁餘黨悉平他若息虎患弭旱災皆德化所感邑人推善政必稱首焉

明崇禎志

蕭敏合肥人由邑庠舉洪武乙丑進士授監察御史以風節著

明崇禎志

程嘉貞以字行合肥人洪武初被薦爲中書省都事蹇諤有骨鯁風丞相徐公開省南服引以自助擢執法諫議官六年授江西按察司僉事行部興安暇卽謁文廟過紫陽精

舍徘徊久之泐然有景仰之思嘉貞以文學稱俗吏之事  
所不屑爲

康熙志

秦鳳字子儀舒城人建文庚辰進士知興山縣有賢能聲擢  
給事中陞郎中以言事改衛輝府同知卒于官持守清約  
人無遺論所撰有永樂太平歌白玉禎祥詩營建宮闕賦  
洪熙輔政策二十五道進呈著高岡遺稿藏于家以孫民  
悅貴贈兵部尙書

康熙志

文景宗合肥人明初授婺源州同知陞徐州知州廉介有守  
時天下初定招徠賑貸勸督農桑民以得生擢守濟南徐  
人立祠祀之子筮以廉幹薦任潛江令改平江

康熙志

商盤舒城人由楷書任御史歷浙江按察司僉事操履清約

人不敢干以私

康熙志

陳瑄字彥純合肥人父聞以義兵千戶歸太祖累官都指揮同知瑄代父職父坐事成遠陽瑄伏闕請代詔併原其父子瑄少從大將軍募以射雁見稱屢從征南番又征越巂討建昌叛番月魯帖木兒踰梁山平天星寨破寧番諸蠻復征鹽井進攻卜木瓦寨賊熾甚瑄將中軍賊圍之數重瑄下馬射傷足裹創戰自己至酉全師還又從征賈哈刺以奇兵涉打中河得間道作浮梁渡軍旣渡撤梁示士卒不返連戰破賊又會雲南兵征百夷有功遷四川行都司都指揮同知建文末遷右軍都督僉事燕兵逼命總舟師防江上燕兵至浦口瑄以舟師迎降成祖遂渡江旣卽位

封平江伯食祿一千石賜誥券世襲指揮使永樂元年命瑄充總兵官總督海運輸粟四十九萬餘石餉北京及遼東遂建百萬倉於直沽城天津衛先是漕舟行海上島人畏漕卒多閉匿瑄招令互市平其直人交便之運舟還會倭寇沙門島瑄追擊至金州白山島焚其舟殆盡九年命與豐城侯李彬統浙閩兵捕海寇海溢隄圯自海門至鹽城凡百三十里命瑄以四十萬卒築治之爲捍潮隄萬八千餘丈明年瑄言嘉定瀕海地江流衝會海舟停泊於此無高山大陵可依請於青浦築土山方百丈高三十餘丈立墩表識旣成賜名寶山帝親爲文記之宋禮旣治會通河成朝廷議罷海運仍以瑄董漕運議造淺船二千餘艘

初運二百萬石寔至五百萬石國用以饒時江南漕舟抵  
淮安率陸運過壩輸淮達清河勞費甚鉅十三年瑄用故  
老言自淮安城西管家湖鑿渠二十里爲清江浦導湖水  
入淮築四閘以時宜洩又緣湖十里築隄引舟由是漕舟  
直達於河省費不訾其後復濬徐州至濟寧河又以呂梁  
洪險惡於西別鑿一渠置二閘蓄水通漕又築沛縣刁陽  
湖濟寧南旺湖長隄開泰州白塔河通大江又築高郵湖  
隄於隄內鑿渠四十里避風濤之險又自淮至臨清相水  
勢置閘四十有七作常盈倉四十區於淮上及徐州臨清  
通州皆置倉便轉輸慮漕舟膠淺自淮至通州置舍五百  
六十八舍置卒導舟避淺復緣河隄鑿井樹木以便行人

凡所規畫精密宏遠身理漕河者三十年舉無遺策仁宗  
卽位之九月瑄上疏陳七事一日南京國家根本乞嚴守  
備二曰推舉宜覈實無循資格選朝臣公正者分巡天下  
三曰天下歲運糧餉湖廣江西浙江及蘇松諸府竝去北  
京遠往復踰年上逋公租下妨農事乞令轉至淮徐等處  
別令官軍接運至京又快船馬船所載不過五六十石每  
船官軍足用有司添差軍民遞送拘集聽候至有凍餒請  
革罷四曰教職多非其人乞考不職者黜之選俊秀補生  
員而軍中子弟亦令入學五日軍伍實亡乞覈其老疾者  
以子弟代逃亡者追補戶絕者驗除六曰開平等處邊防  
要地兵食虛乏乞選練銳士屯守兼務七曰漕運官軍每

歲北上歸卽修船勤苦終年該衛所又於其隙雜役以重  
用之乞加禁絕帝覽奏曰瑄言皆當命所司速行遂降敕  
獎諭尋賜券世襲平江伯宣宗卽位命守淮安督漕運如  
故宣德四年言濟寧以北自長溝至棗林淤塞計用十二  
萬人疏濬半月可成帝念瑄久勞命尙書黃福往同經理  
六年瑄言歲運糧用軍十二萬人頻年勞苦乞於蘇松諸  
郡及江西浙江湖廣別僉民丁又於軍多衛所僉軍通爲  
二十四萬人分番迭運又江南之民運糧赴臨清淮安徐  
州往返一年失候農業而湖廣江西浙江及蘇松安慶軍  
士每歲以空舟赴淮安載糧若令江南民撥糧與附近衛  
所官軍運載至京量給耗米及道里費則軍民交便帝命

黃福及侍郎王佐議行之更民運爲兌運自此始也八年十月卒於官年六十有九追封平江侯贈太保諡恭襄初瑄以清河有德於民民立祠清河縣正統中命有司春秋致祭孫豫字立卿讀書修謹正統末福建沙縣賊起以副總兵從寧陽侯陳懋分道討平之進封侯也先入犯出鎮臨清建城堡練兵撫民安靜不擾明年召還父老詣闕請留從之景泰五年山東饑奉詔振卹尋守備南京天順元年召還益茂祿百石三年卒贈黔國公諡莊敏子銳嗣伯成化初分與三千營及團營尋佩平蠻將軍印總制兩廣移鎮淮陽總督漕運建淮河口石閘及濟寧分水南北二閘築隄疏泉修壩廢堡總漕十四年章數十上日本貢使



買民男女數人以歸道淮安銳留不遣贖還其家淮揚饑  
疫煮糜施藥多所存濟宏治六年河決張秋奉敕塞治還  
增祿二百石累加大傅兼太子太傅十三年卒

明史列傳

龍源合肥人少警敏力學永樂初預修大典授工科給事中  
親喪家居見民牧不良卽聞於朝其人路當道誣之遂罷  
歸

江南通志

方正合肥人永樂初徵修大典入太學授工部主事時建北  
都督工規畫有條由屯田郎擢江西叅政平峒賊遷福建

布政使

江南通志

張敬字伯起合肥人永樂中貢入太學除廣東道監察御史  
扈從北征軍令嚴肅凱旋有金牌銀幣之賜監閩延平府

銀屏山務歲輸外不染一毫擢陝西按察司僉事政尙平  
恕務存大體因被誣左遷令廣平怡然抵任勸農興學惠  
愛覃敷復官僉事致仕子鏐鏐子淳

康熙志

周璞巢縣人國子生同知全州政暇讀書不輟永樂中薦入  
中秘預修大典書成授吏科給事中糾劾不避權勢朝有  
諫垣得人之慶

康熙志

丁毅字士宏無爲人永樂乙未進士選庶吉士讀書翰林剛  
介敢言時近倖有紀綱者勢傾中外衆莫敢忤毅獨以年  
少詞臣持正論與之抗綱服其理直竟不能害年三十餘  
卒時其惜之從子鏞字元聲正統初以歲薦入太學授戶  
部主事督天津等倉糧餉盡絕賂遺者一繩以法直聲聞

於朝陞廣西叅議以寬大得民致仕歸卒年六十七

康熙志

盧璟字德輝廬江人永樂戊戌進士由庶吉士改御史立朝

方正居家孝友

康熙志

王憲合肥人永樂辛丑進士官御史性峭直彈劾無所忌擢

山東副使鎮遼東叅贊機務邊境肅然進貴州廉使

康熙志

鄭泰字景暘舒城人端敏有器量永樂辛丑進士任給事中

諱言動輒進都給事中超補刑部侍郎璽書褒異天順初

遷吏部左侍郎卒賜祭葬

康熙志

吳鑑合肥人宣德丁未進士官御史剛正不阿嘗乘花馬京

師爲之語曰花馬吳猶古所謂驄馬云陞南陽知府

康熙志

朱昂字廷舉無爲貢生任應天府判陞工部郎中周文襄忱

薦領江南糧儲歷陞福建叅政嘗掌臬司事三日間出濫  
繫二百餘人年六十引疾歸居鄉如未嘗有勢位者地方  
利害嘗陰白有司人或造謝則杜門不見壽八十餘

江南通志

李春字景暘無爲人正統丙辰進士官兵科給事中有直聲  
天順中轉福建參議汀盜起春親抵巢穴諭降進江西左  
參政撫諸洞反側者悉就馴伏歷兩藩俱著聲績

江南通志

胡珉字文佩舒城人正統壬戌進士戶部主事簡直清約嘗  
略惡其慙調判河南衛輝府引疾歸復以薦出終漳州府  
同知葉鸞鄭時皆其門人也

康熙志

蔡瑛字淑輝舒城歲貢任嘉興府推官明允無冤獄擢御史

巡按江西

康熙志

湯鼎字玉鉉無爲人居祖母喪三年不見齒宣德庚戌進士官吏科給諫交阯侵邊疆廷臣舉鼎爲使鼎往歷陳利害眾懼服不敢動卒歸侵地正統間官通政使卒官  
康熙志

方杲字景輝合肥人正子正統乙丑進士授兵部主事以廉平稱己巳兵警奉敕取戰馬於南京還升員外郎上時務十二事剴切有資治體少保于謙嘗曰方郎通敏練達有用之材也尋遭疾卒年三十三  
康熙志

蘇會廬江人本姓汪景泰二年任四川雙流典史以清幹稱善弓馬習番書時番人不靖撫按命渡河宣諭往返者三眾皆悅服天順初擢仁壽知縣有惠政民爲立祠以節邊功陞茂州知州未幾請老  
康熙志

葉鸞字應和舒城人景泰辛未進士任貴州叅議黔中雜苗難治鸞廉靜忠誠按部所至蠻人赴愬者多持金馬求直盡卻之一斷以法有宣慰判人腸藩臬諸司莫能糾鸞遣馳諭卽謝罪又宣慰有奪嫡者僉允其請鸞獨不肯署名親老授副使終養

江南通志

鄭時字宗良舒城人景泰辛未進士任監察御史以懇直降內鄉知縣都御史某力薦之超爲延平守政績甚著丁父母艱廬墓三年有白兔馴擾之異有司上其事時追止之歲災發困煮粥以活飢者擢撫陝西適大疫賑恤百方授方畧以平礦盜奏設寧羌等處縣治巡司職專守禦崔苻屏息成化未有挾左道得幸者時上疏論之陳利國保民

五事直切忤旨謫貴州布政司參議宏治改元召爲左副都御史轉兵部侍郎晉司寇引年致政家無餘資卒贈太子少保賜葬祭時爲人端厚簡慤鄉評至今重之

江南通志

王維字資用巢縣人景泰癸酉舉人仕臨江府通判以善政聞

康熙志

沈諒合肥人景泰甲戌進士歷部郎知東昌府政尙嚴明常祿外不名一錢折獄明允銓部考核天下廉能官注第一

江南通志

鮑德字秉仁舒城人景泰丙子鄉薦知衡山縣調華容治邑九年興學勸農懲奸理冤稱湖湘第一仕至饒州同知

王敬字惟瞻廬江人景泰間貢監任大理評事甫視事卽力  
白三原王恕之冤累論多之陞本寺副

江南通志

王恒字克昌敬之子以童子從父南雍能習簪盂舉大書天  
順帝召見御前作天下太平四字上覽之喜賜寶鈔羊酒  
送翰林院讀書時年十二擢中書舍人加太常丞性落落  
不苟合景移工部主事視蕪湖樵御羨餘數千緡領度支  
司漕淮上興利革弊多所建明宏治間卒祀鄉賢

康熙志

秦民悅字邦約舒城人天順丁丑進士授行人習工部員外  
郎裁抑中貴私剋之弊出知廣平府括流移荒地三千五  
百頃聽民耕種斂租備賑擢江西參政累陞戶兵二部尚



書卒諡莊簡

江南通志

郭鉉合肥人襲彭城衛指揮使成化初以從征蕩浦功進都指揮僉事中武舉遷同知宏治中擢總漕運沈毅有智略凡軍民利病必陳於朝嘗濬通州河置壩令淺船搬運歲省白金數萬孝宗時朝政整肅文武大臣率得人鉉管漕十三年不易正德初始召佐後府尋卒

明史王信傳

吳凱合肥人成化壬辰進士擢兵科左給事中詳封駁善敷奏動存大體承旨覈邊儲罷武弁不職者四百餘員仕至廣東少叅

江南通志

張淳合肥人成化丁未進士令瀏陽糧長侵賦鉅萬淳以至誠勸諭並感泣輸完擢御史按貴州用計擒賊渠餘黨五

十九寨悉就撫轉吉安知府多善政民爲立祠累遷至副

都御史

江南通志

周琥合肥人宏治壬子舉人司理撫州陞通判時宸濠反江西橫行剽掠撫守懼稱病不視事委琥代攝濠遣卒收郡印琥曰朝廷名器誰敢取又誰敢與竟獲保全王公守仁令琥督運餉贊兵事勞瘁不起深爲痛惜命有司厚卹護其喪歸

康熙志

方欽字寅之巢縣人宏治壬子舉人知福山縣同官俱爲流賊所害欽以好官不要錢獨免大璫劉瑾用事當道致諸屬金銀獻媚欽獨無所輸因注下考詣齊河教誨量移福建接察司經歷致仕卒祀鄉賢子渠

康熙志

尉春合肥人宏治癸丑進士任兵科給事中陳時政入事邊務七事咸見施行叅議福建叅政廣西以鯁介爲忌者中

傷乞歸

江南通志

孔彪字世奇合肥人中宏治戊午鄉試知東阿清平陽穀三縣竝著賢聲遷知沁州歸日惟以書史自娛爲當途所重

康熙志

楊欽字敬之合肥人宏治壬戌進士太宰馬公文升重其器識授戶部主事監度支平所面清部卒倉場肅清疏論錢弊通商貨成玩法挽頭數十人上采納之陞兵部車駕郎中在部不阿權貴裁抑私符條陳邊事甚爲大司馬劉公大夏倚任尋丁外艱服闋補刑部擢光祿少卿守正杜私

與時齟齬竟十年不調嘉靖乙酉冢宰東光廖公立歎曰  
楊君廉吏也薦爲南太僕少卿晉鴻臚卿卒於官

明崇禎

志

曹琥字瑞卿巢縣人宏治十八年進士授南京工部主事改  
戶部既抗疏救周廣吏部擬調河南通判錢寧欲遠竄乃  
改尋旬再遷廣信同知寧王暨鎮守中貴託貢獻頻有微  
斂琥攝府事堅持不予士民德之擢鞏昌知府未任卒嘉

靖初贈光祿卿

明史周廣傳

徐玉字汝德廬江人宏治中歲貢官宣府都司斷事性極梗  
介雖貧不渝卒之日無以爲殮士論重之祀鄉賢

康熙志

沈俊字人傑合肥人正德辛未進士知萊陽縣賦役繁重俊

極力瀚刷政教漸興拜監察御史性渾樸不事矯飾按山西湖廣所至老成持重動合憲體卒山東叅議子孫貧寒至不能自存

康熙志

方渠字圓夫巢縣人正德癸酉舉人知平陰縣未幾以耿直忤當道拂衣歸囊無長物郡守貲送不受貧窶以終渠性清真持已特介卽燕會亦不輕赴興至朗吟獨眺盡日乃

返

康熙志

吳廷翰字崧伯無爲人博敏能文正德辛巳進士歷兵戶二部主事轉吏部文選司補廣東浙江僉事陞山西叅議致仕所至不激不隨撫循建白皆井井可法督學時彈治時貴風裁矯峻人不敢干以私曾被命採端溪硯不持一枚

其廉謹多類此晚於城東築室攬煙水之勝著漫錄叢言  
續記志略考湖山小稿蘇原諸集子國寶進士工部主事

詩文亦有聲

康熙志

何瑚字希賜廬江人正德中歲貢質樸明敏初知臨漳縣舉  
循良擢河南道御史清約不減寒素以執法被中傷歸隱  
黃屯山中盡謝交游力農種樹口不言貧祀鄉賢

康熙志

岳倫字天敘萬全都司籍無爲人自少以氣節自負嘉靖丙  
戌進士授行人歷工部郎名重一時已亥諫南巡被杖奪

官

康熙志

方介字子和合肥人嘉靖乙未進士尹義烏黃巖陞高州同  
知進工部郎中陞處州知府所至以廉著性饒介有古循

吏風 明隆慶志

董子策字霞峯合肥人嘉靖戊戌進士以戶部郎視榷計墅  
關商舶輻湊乃就關傍別開支河令曰凡舡舫可出此橋  
者聽商民德之強仕乞休絕意通顯嘉靖末進廣東按察  
司僉事辭之林居四十餘年著述甚富遠近丐其文或不  
時應率敦請至再里中遇難得之物輒作諺語相詫曰豈  
求董進士文耶晚年施子無算人以田屋售倍價不少靳  
曰令貧者心折耳

康熙志

宛嘉祥字白湖廬江人嘉靖癸卯舉人判廣信守臨清遷戶  
部郎踰年知貴州思南府刑清政簡時土寇瞞天大王聚  
眾萬餘爲州邑害十餘年嘉祥設法招徠諭以恩信寇率

偽帥六人歸命朝廷嘉其功令久任撫戢餘眾四境帖服  
民間立碑頌德肖像祀之

江南通志

劉崙字山甫無爲人嘉靖甲辰進士擢御史巡視陝西請查  
復金牌舊制修舉茶馬八事回按順天涼陳畿輔饑荒疾  
苦巡撫湖廣會景王之國德安崙營辦有方公私不擾楚  
人頌之

江南通志

柳希玘字子敬廬江人嘉靖庚戌進士在郎署每事繩抑勛  
貴出守廣平治河隄以塞橫流創書院以育英俊實倉儲  
以賑荒旱後以陝西臬副晉湖廣叅政乞休閉門著述絕  
迹公庭損產分第都無私橐祀鄉賢

康熙志

曹本字子立巢縣人琥次子也嘉靖庚戌進士知慈谿縣以



禦倭功陞戶部主事督理糧儲清各牘車戶船戶諸弊其  
爲令時獨不屈於趙文華尤克承先德云

康熙志

秦寵字異齊合肥人嘉靖乙卯舉人任荊州同知楚撫王世  
貞獎其才能列首薦陞本府知府轉廣西副使清風兩袖  
歸臥田園以壽終

康熙志

蔡悉字士備合肥人嘉靖三十八年進士授常德推官築郭  
外六隄以免水患擢南京吏部主事累官南尚寶卿移署  
國子監嘗請立東宮又極論礦稅之害有學行恬宦情仕  
五十年家食強半清操亮節淮西人宗之

明史儒林王畿傳

蔡氏家譜天啟辛酉葉向高等請謚文毅祀鄉賢專祠肖像  
萬振孫字性備合肥人嘉靖壬戌進士服官剛正自部郎知

襄陽府舉覈屬令賊過雖賄監司爲解弗釋也陞副楚臬  
礦使縱橫振孫捕其爪牙立斃之以忤旨削籍起廣東叅  
政未就卒

江南通志

胡璉字廷器巢縣人貢生知山西忻州以平易著績調吉州  
九載秩滿百姓挽留之

康熙志

朱來遠字文甫廬江人萬歷丁丑進士初令秀水除雜差以  
蘇民禁私販以惠商勸課省刑時稱善治仕至太常少卿  
引疾歸居鄉孝友敦睦卒祀鄉賢

江南通志

閻錄字肅仲巢縣人萬歷乙酉舉人淡足自好親故待以舉  
火者甚多知武強縣值歲飢詢疾苦議賑貸建學修志士

民繪圖以祝

康熙志

趙元吉字慎所合肥人萬歷乙未進士工部員外郎出知建

昌府以骯髒忤俗致仕

康熙志

朱萬春字寰同無爲人萬歷辛丑進士知上饒過瑞登開採之授省長差拖累之患擢御史劾本兵糾總河論首輔請東宮出閣講學按四川奏留帑金充採辦免加派賑荒災轉江右道平鄱湖劇賊內陞歷左通政使

江南通志

吳光義字行可無爲人萬歷辛丑進士初授仁和令有異政與吳江令劉孟胥秀水令朱上愚稱東南三令尋擢工部主事理山海關流民亡繻者多不得歸公百計周全凡一月得生還者數萬人備兵神木道曲爲邊人造命轉四川副使以平奢賊著功歷陞河南巡撫副都御史時猗賊初

平積案充棟方溽暑篝燈夜判開釋株連者不勝計吏畏  
民安刊有中州奏議若干卷以內艱歸士民戴德額請崇  
祀名宦祠家居值流寇犯境捐貲募士以倡城守並疏陳  
善後諸策闔邑得保無虞起倉場總督轉北兵部侍郎以  
老疾乞休卒於家蓋歷仕四朝清慎如一日也

江南通志

龔承先字元鑑合肥人先世爲豫章人承先家貧力學領萬  
歷癸卯鄉薦知浙江分水縣有惠政陞祿勸州知州乞歸  
卜築城西令諸子姪講學其中後以孫鼎孳贈兵部尙書  
卒祀鄉賢子萃肅進士授吉安推官部注清官第一擢御  
史論邊督張我續貪冒之罪白知州汪心淵守徐之功糾  
袁崇煥之壞疆場舉方震孺之有才品頗爲舉職差長蘆

巡鹽內陞太僕寺少卿萃肅子并權原名鼎蕃次鼎英舉人官戶部主事詩文俱有稱

康熙志

寶子偁字燕雲合肥人萬歷壬辰進士授大理評事抗疏請建儲董上谷餉進羨金六萬賜金褒異守泉州課最督學湖廣注廉明第一觀察浙江遷福建布政使所在士民尸祝焉以與中丞不協掛冠歸世稱淮南先生祀鄉賢

康熙志

趙一韓字如勃巢縣人萬歷甲辰進士司李九江時中璫收稅恣爲攫取一韓痛繩以法遷南工部視權蕪關廉聲比前官葉茂才累晉貴州副使魏璫時能直節自振

江南通志

劉汝佳號紫芝無爲人萬歷丁未進士授工部主事以越俎言事自劾歸後起原官督修都城省水衡金錢數萬轉都

水郎建議每船止抽一單空船宐免後知金華府憫糧里  
僉解之苦改用募官下戶盡食其福著有婺州集

康熙志

徐起元字長民合肥人居遼東中萬歷壬子鄉試質譜系於  
廬人徐氏始知其爲肥人也官鄖陽同知陞知府時楚寇  
充斥起元隨機勦御境內以安超升鄖陽巡撫

康熙志

許如蘭字湘曉合肥人萬歷丙辰進士知光州遷工部郎中  
知紹興舉卓異備兵密雲轉蒲州道密人請留未赴旋命  
撫薊再撫廣西折悍藩平普莫二賊進副都御史

江南通志

胡志藩字屏玉合肥人天啓乙丑進士授中書舍人先是郡  
中馬驛係肥舒廬無六州縣協濟後獨累肥民爲重困志  
藩具疏言州縣苦樂不均奉旨下部議者再卒見俞允白

是僉點僮募五屬俱得其平其爲德於鄉者甚大入御史  
臺按宣大驕將悍卒靡不懾服卒於官

康熙志

李遠字二則合肥人天啓丁卯舉人直指使重其才疏薦之  
叙城守功下部紀錄入南都授中書舍人加職方郎中管  
章奏閣部史可法具題加銜順治初起補未仕還原名當

泰

康熙志

張克佳字士奇無爲人幼年作洪水賦有名事母兄以孝友  
著崇禎戊辰成進士司李青州至任卽除一大猾時蕪妖  
煽亂克佳每于雪夜單騎巡警一郡以安引疾家居數十  
年凡里中事有益於民者輒力請諸當道如築鮑魚壩及  
建閘賑米之類

康熙志

賈或字煥章舒城人以貢任韶州司李韶山險峻獠獠出沒或募民兵搗其穴平之嶺南素無雪是夕大雪三尺僉謂平寇所致陞南昌別駕疾歸隱崇陞山里人婚葬不給者推分周之人服其義

康熙志

張振鸞舒城人歲貢授歸安丞邑顯宦沈淮家遺糧執其僕笞之趣納如數署武康縣事有誓神殪虎之異

康熙志

吳士講字心啓合肥人崇禎辛未進士授南兵部車駕司以員外郎出知大名府復補開封府有惠政汴人德之李自成攻圍歲餘城中食盡府署有石榴一株諸生請太守鋸屑分散食之饑困如此尙從周藩協力死守城得暫完河決後乘桴以出叙功陞下川南道

康熙志



蔡淑達字雲衢合肥人少與叔父悉究極性命之旨遵母喪  
三年哀慕如一日萬歷癸未成進士丙戌授上虞令久之  
調湖廣襄陽攝襄陽府符遷陝西商南令竭心撫字招集  
流移多方開墾興文釐弊有循良名時權璫趙梁以派礦  
爲秦中害達請命於上派稅特輕六年轉戶部郎督捕口  
糧宿弊一清督龍江關稅冰清自矢綜理精密出守廣西  
南寧府時黎寇竊發徵遣兵所過如埽乃豐其委積遣之  
仍嚴部處使不得橫有兵奪商人舟淑達置之法晉滇南  
按察副使權布政司事以清儉先察案奉上勅督理糧儲  
管鹽法以課資灶戶均其徭役禁有司不得擾而額課用  
饒歸以積勞成疾卒

縣志

任天成字玉仲舒城人崇禎甲戌進士初任大理寺評事恤刑兩浙還朝擢監察御史有治亂關乎用人一疏又叅鳳督馬士英擁兵糜餉不報甲申按浙時勢雖不可爲猶能整肅一方林居二十餘年手不釋卷子光世舉人能詩文早卒

康熙志

葉士彥字無美巢縣人貢於庠卽留心民瘼叩閭上六議皆興除要務巢人德之赴鄉會試皆監旗焚香以祝崇禎丁丑聯捷授刑部主事調兵部職方司出江西僉事時湖廣帥左良玉有異志士彥致書曉以大義言足下心實無他所以見疑緣兵驕不敢違累及其主左爲心服撤兵後與袁撫不合謫歸家居抗直以疾惡太甚卒爲羣小所陷

康熙

縣志

方夢禎字伯瑞舒城人其先歙人崇禎己卯貢於鄉不次授工部主事陞員外郎力止北直折漕督徐淮中河樹隄催運有國爾忘家之獎

康熙志

高麟游字泰符合肥人選舉入辟雍授廣西靈川令歷任州縣以年勞遷慶陽東路同知廿載冰蘖端方廉靜捐資助城守尤有功焉

康熙志

王玠字寶之巢縣貢生知永豐縣民感其德瀕行爲建亭以誌去思

康熙志

國朝

趙函乙字授若合肥人順治乙酉與兄觀乙同舉於鄉丁亥

成進士授戶部郎權崇文門稅以千金義納公帑遷江西督學修進賢坪宋忠義密公祠有記

康熙志

王綱字燕友合肥人順治壬辰進士官刑部郎改兵部督捕逃案山積綱爲振滯獄釋株連冬日流徙出關者施湯粥衣絮選授巡倉御史終通政左右參議

江南通志

王絲字言如合肥人總角能文順治戊子鄉魁授黃州司李決獄平恕嘗讞副將高誠且之獄高密以畧貯金托鹽齎以進公厲聲拒之好誘進單寒賞識多爲國器會以吏議左遷裕州僉判裕荒敝又值衝衢公出資墾荒地以歲收代民煩費後乞歸閉門却掃衣敝不改易性好委曲濟人不責其報所著有年草古文警

康熙志

王舟字泳思合肥人舉進士知蜀太平縣遭難間關旋里政

迹載太平志

康熙志

束四箴字去非舒城人明季舉人晚授莊浪知縣恆馬戶擒

盜魁縣人稱之卒於官

康熙志

曹同統字能紹巢縣人舉進士授懷慶司李有廉能聲轉瓊

州同知改東昌

康熙志

張肯穀字式似巢縣人歲貢任神木令後署秦州兵變被執

不屈以計得脫因導諸軍進勦有功以忠忱優敘超守鳳

翔再守濟南皆異數云

江南通志

夏景耀字稚光廬江人以明經任儀隴知縣蜀中經兵燹儀  
尤殘破招徠勸墾流移漸得安集陞岳州府同知時新隄

鳳州府志卷二十一  
民喜鬪訟盜賊並起景耀臨御有法市賴以安公署蕭然  
下帷涉書史及勘災傷理積遺躬親勞瘁吏其能欺率於  
官士民思之莫不流涕政績載岳州志著有聽浚居集半

月堂詩文集

康熙志

宋元微字式虞廬江人  
中康熙戊辰進士初任夏津有宦僕  
謀殺人而主名未得單騎往驗忽塵沙颺起旋繞馬首元  
微悟詣宦宅大呼揚成爲誰果獲其人服罪一時有神君  
之誦陞戶曹歷刑曹某宦告奴叛主例應立決元微察其  
辭色有異微服訪彰義門外遇途人聚語曰前時日照縣  
荒某姓攜妻來京覓館某宦延課子窺其妻艷卽陰以其  
名著籍某宦後館三年辭去某宦忽變色呼以奴隸某與

爭卽告其叛主寃哉是獄元徵聽之悉次日嚴訊某宦吐  
實服辜而某得釋由是名益震年六十三卒夏人請祀名  
宦康熙五十九年祀鄉賢有蘊真草行世其七言古詩頓  
挫曲折深得古人體

縣志

吳開允字志從無爲人前兵部侍郎光義長子順治六年知  
福建建寧府下車時賊初平有明都憲張養素富累巨萬  
有司利其財誣爲通賊總戎發兵繫其男女百餘口狼籍  
道路制府陳錦撫軍張學聖檄開允訊其獄開允卽詣總  
戎索囚軍中有譁聲開允厲色曰兩臺檄本府訊獄爰書  
未定張氏男女可畱軍中乎如不盡發某卽以印檄繳總  
戎馳報制撫矣總戎悚然付之旣至置諸府儀門外廡立

取民間保媼諭守之雞鳴會三廳二縣焚誓告神質于城  
隍廟有司仍附耳以利動謂加極刑於其嬌穉則誣服矣  
笑而應之就神前立白其冤牘上制撫日尙未哺也悉縱  
遣之制撫咸曰治獄如建寧守七閩不難治矣開允爲人  
樸質寡言笑重然諾飲啖兼數人望而知其爲長者江南通志  
仰鳳鳴字寢明無爲人方伯諱昇之元孫順治三年歲貢初  
任婺源教諭陞太平教授代理府事禦寇有功值歲荒賑  
活飢民甚眾擢陝西西安府同知年七十致仕

州志

楊交泰無爲人順治己丑以歲薦授廣東番禺令時郡邑初  
定大兵分駐廣州居民駭恐奔山竄海尙未安堵交泰甫  
入境招集流移民多帖服時有負固巖穴者大兵將遂進



勳交泰諫沮頗親往招之單騎深入聚父老諭以禍福  
感其誠欣然歸附款留設酒食旦日焚香道送者數千人  
近城有山頗險峻時恐有伏莽將舉火焚之交泰又力沮  
獲免搜山得男婦數百人令其族屬率歸由是禺民賴以  
安輯以積勞成疾乞休士民建祠以祀歸里後屢舉賓飲  
卒年九十有六

州志

張名世無爲人順治甲午舉於鄉授廣德州學正戊午奉檄  
分校粵閩得人爲盛擢山西垣曲令垣居萬山之中城大  
如斗地瘠民貧名世飲水自矢撫綏備至士民愛戴之以  
疾卒於任

州志

吳問啓字旦門無爲人兵部侍郎光義第四子由歲貢生授

山東文登縣令康熙丁巳文營以給餉後期兵譁變起聞  
啓身被六創隨單騎入營諭以禍福一夕而軍心定民得  
安堵文邑紳士繪有山左定亂圖記竝立靖亂碑於蓬萊  
閣弟敏文字虞升諳輶略工詩畫滇南之亂仗策從征以  
軍功授陝西醴泉縣令釐奸剔弊下士恤民醴人愛戴之  
所著有花嶼詩集弟吳字予高由廩貢生任秘書院中書  
陞雲南楚雄府同知奉調領五千民夫往黔省撥運吳藩  
家口赴滇會吳逆已叛合境騷擾民夫駭散受僞職者種  
種吳潛以單騎出重圍由九盤奔赴荊州軍一時視師親  
王暨閫外諸大臣嘉其完節生還交章薦達特簡河南開  
封府同知後以母憂去官

州志

朱前詒字燕以無爲人順治甲午舉人授長沙縣令兵燹之後戶口凋瘵豪猾橫行前詒恩威並濟遂大治以治行量移貴州麻哈刺史麻哈去京師萬里苗民雜處苗尤嗜殺與郎壩諸寨相接兇狠難化官吏畏如敵國前詒入境單車抵其巢穴謂誠布公曉以利害諸苗俱悅服羅拜思州山苗有兄弟相讐殺者八載不解前詒諭之乃解麻哈無學宮讀書應試者絕少前詒詳請建學延隣邑文士爲塾師稽其勤惰仍請於撫軍每試入學二名丙子鄉試有王生銑者遂登賢書民始向學報最擢順天府治中未赴任而卒

州志

李天馥字湘北合肥人順治戊戌進士由翰林院檢討擢國

子監司業拔士韓葵等一變當時文體歷工刑兵吏四部  
尙書協辦大學士薦陸隴其邵嗣堯遲斨彭鵬諸人後皆  
爲名臣年六十丁母艱還里結茆墓側三年不入城市感  
白燕來巢服闋拜武英殿大學士在相位五年宰物應機  
一以虛公處之嘗以變法不如守法救弊不能無弊奉行  
惟謹不敢失尺寸有古大臣風卒謚文定

胡永亨字肇美舒城人父守恆以明崇禎壬午城陷罵賊死  
永亨募勇士夜入賊營收父骸而葬之家居孝友尙義好  
施康熙庚戌成進士典試江西公愼自矢號稱得人尋遷  
民部郎嘗鞠粵東獄仁恕得情分巡肇高廉羅道飲冰茹  
蘗多所釐剔息事寧人幾於無訟人比之包待制云

江南通志

湯愛鼎字旺衡巢縣人廩貢訓導靈璧遷知滿城除耗羨清  
疆理抑強梁治最擢瓊州守叅劾屬吏貪酷者不少貸江  
南通志

李榮裕字獻丹廬江人雍正丙午舉人聘充己酉湖北同考  
官選湖南藍山知縣縣處苗疆最難撫綏榮裕教以禮義  
民皆向化時山水暴發漂沒田廬榮裕捐俸籌產助民興  
復及攝桂陽州牧藍山民追送數百里爲立祠繪像以祀  
之以終養歸行李蕭然晚年善岐黃求醫者雖窮簷蔭屋  
恆策蹇造焉其樂於濟人如此

陳大化字菴士廬江人乾隆戊辰進士授編修壬申分校禮  
闈稱得人擢御史歷吏禮刑工四科給事中風裁凝峻遇

寧敢言出爲江蘇常鎮道整飭廉隅官吏皆奉法以母老  
乞歸養內艱服闋補江蘇松太道在任多善政濬開松浜  
去淤墊以資灌溉民德之調江蘇糧道署按察司以疾歸  
乙巳大饑捐白金六百以助賑全活甚多年七十二卒所  
著有封池制藝蓉鏡軒詩賦行世

廬州府志卷二十八

名將上

陳眾 任忠 陳稜 袁襲

戴友規 劉威 臺濛 李友

王綰 王興 王安 王稔 鍾泰章

李章 田頽 朱廷壽 王景仁

劉虎

廬州府志卷二十八

賜進士出身廬州府知府溫陵張祥雲主修  
名將五

漢

陳嶽廬江人爲揚州從事建武中李憲餘黨淳于臨等聚眾數千人屯潛山攻殺安風令揚州牧歐陽歛遣兵不能剋帝議欲討之嶽白歛請得喻降臨於是乘單車駕白馬往說而降之潛山人共生爲立祠號白馬陳從事云

康熙志

陳

任忠字奉誠小名蠻奴汝陰人也多計略膂力過人尤善騎射州里少年皆附之梁鄱陽王蕭範爲合州刺史聞其名



引置左右侯景之亂忠率鄉黨數百人隨晉熙太守梅伯龍討景將王貴顯於壽春每戰卻敵隨範世子嗣率衆入援會京城陷旋戍晉熙侯景平授蕩寇將軍王琳立蕭莊署忠爲巴陵太守琳敗還朝遷明毅將軍安湘太守仍隨侯瑱進討巴湘累遷豫章太守太建初隨章昭達討歐陽紇于廣州以功授直閣將軍遷武毅將軍廬陵內史秩滿入爲右軍將軍五年獻軍北伐將兵出西道擊走齊歷陽王高景安於大岷逐北至東關仍克其東西二城進軍蕲譙竝拔之徑襲合肥入其郛進克霍州以功授員外散騎常侍封安復縣侯邑五百戶尋詔忠都督壽陽新蔡霍州緣淮衆軍進號寧遠將軍霍州刺史入爲左衛將軍十一

年加北討前軍事進號平北將軍率步騎趣秦郡十二年  
遷使持節散騎常侍都督南豫州諸軍事平南將軍南豫  
州刺史增邑并前一千五百戶仍率步騎趣歷陽周遣王  
延貴率眾爲援忠大破之生擒延貴後主嗣位進號鎮南  
將軍入爲領軍將軍加侍中改封梁信都郡公邑三千戶  
出爲吳興內史加秩中二千石及隋兵濟江忠率數騎往  
石子岡降之授開府儀同三司卒時年七十七子幼武官  
至儀同三司

陳書列傳

隋

陳稜字長威廬江襄安人也祖碩以漁釣自給父峴少驍勇  
事章大寶爲帳內部曲告大寶反授譙州刺史陳滅廢于

家高智慧汪文進等作亂江南廬江豪傑亦舉兵相應以  
峴舊將共推爲主峴欲拒之稜謂峴曰衆亂旣作拒之禍  
且及已不如僞從別爲後計峴然之時桂國李徹軍至當  
塗峴潛使稜至徹所請爲內應徹上其事拜上大將軍宣  
州刺史封譙郡公邑一千戶詔徹應接之徹軍未至謀洩  
爲其黨所殺稜僅以獲免上以其父之故拜開府尋領鄉  
兵煬帝卽位授驃騎將軍大業三年拜武賁郎將後三歲  
與朝請大夫張鎮周發東陽兵萬餘人自義安汎海擊流  
求國其主歡斯渴刺兜遣兵拒戰鎮周頻擊破之稜進至  
低沒檀洞其小王歡斯老模率兵拒戰稜擊敗之斬老模  
渴刺兜率衆逆拒稜遣鎮周擊走之乘勝逐北斬渴刺兜

獲其子烏槌虜男女數千而歸進右光祿大夫武賁如故  
遼東之役以宿衛遷左光祿大夫明年帝復征遼東稜爲  
東萊畱守楊元感作亂稜率衆擊平黎陽斬元感所署刺  
史元務本尋奉詔於江南營戰艦至彭城賊帥孟讓據都  
梁宮阻淮爲固稜潛於下流濟至江都襲讓破之以功進  
位光祿大夫賜爵信安侯後帝幸江都宮俄而李子通據  
海陵左才相掠淮北杜伏威屯六合衆各數萬帝遣稜率  
宿衛兵擊之往往克捷超拜右禦衛將軍復度清江擊宣  
賊賊俄而帝以弑嗣宇文化及引軍北上召稜守江都稜  
集衆縞素爲陽帝發喪備儀衛改葬於吳公臺下衰杖送  
喪慟感行路論者深義之後爲李子通所陷奔杜伏威伏

威忌之尋見害

隋書列傳

五代

袁襲廬江人太祖爲廬州刺史襲仗策從軍料事多中畢師  
鐸之攻廣陵也呂用之詐爲高駢牒署太祖行軍司馬徵  
兵入援襲說太祖曰高公昏惑用之姦邪師鐸悖逆凶德  
參會而求兵於我此天以淮南授明公也太祖遂率廬州  
兵赴之會師鐸殺高駢太祖入據揚州孫儒之亂復熾襲  
曰吾以新集之衆守孤城而諸將多高氏舊人非有厚恩  
素信力制而心服之也今儒兵方盛所攻必克正諸將持  
彼此因強弱擇嚮背之時也海陵鎮使高霸駢之舊將此  
必不爲吾用者因勸太祖以軍令召霸霸卽率所部兵來

太祖因伏甲誅霸得其兵數千明年儒攻揚州克其外郭  
太祖倉皇出走將奔海陵襲曰海陵難守而廬州吾舊治  
也城廩完實可爲後圖太祖乃走廬州久之未知所向問  
襲曰吾欲卷甲倍道西取洪州可乎襲曰鍾傳定江西口  
久兵強食足勢未可圖趙鏐新得宜州怙亂暴殘衆心不  
附公宜卑辭厚幣說和州孫端上元張雄從采石濟師侵  
其境彼必來逆戰公自銅官渡江會之取鏐必矣太祖用  
其言遂禽鏐入宣州朱全忠與鏐有舊遣使來求鏐襲曰  
不如斬首遺之以杜後患鏐由是被殺未幾襲卒太祖哭  
之曰天不欲成吾大功邪何爲折吾股肱也吾好寬而襲  
每勸吾以殺此其所以不壽與

十國春秋吳列傳

戴友規廬州人居太祖幕中爲賓客太祖鎮宣州時與孫儒戰失利欲退走召諸將畫策友規曰儒來氣銳而兵多蓋其鋒不可當而可以挫其銳不可敵而可久以敝之若避而走是就禽也淮南士民從公渡江及自儒軍來降者甚衆公宜遣將先護送歸淮南使復生業儒軍聞淮南安堵皆有思歸之心人心旣搖安得不敗太祖從其計遂大破儒兵

十國春秋吳列傳

劉威慎縣人仕太祖爲牙將武進之役與安仁義等破劉建鋒有顯功已而孫儒屢勝太祖太祖欲退守銅官威言賊倍道遠來背城堅柵可以不戰疲之太祖以爲然久之儒兵餒且大疫儒遂爲所禽未幾授廬州刺史已又遷觀察

使是時四郊多壘井邑蕭然威內撫百姓外禦寇兵廬州以寧搃鎮南軍節度使撫州危全諷帥兵十萬來攻洪州時守兵裁千人將吏聞之多失色威密遣使告急於廣陵而日召僚佐奏樂宴飲神氣閒暇旁若無人全諷懷疑不敢進及周本將兵救高安全諷被執而洪州獲全實威之力也天祐九年徐溫旣族李遇常內忌威欲興師致討威用幕客黃訥言與陶雅輕舟詣廣陵以明無二心溫相待如事太祖禮優加官爵隨遣還鎮居數年卒子崇景官袁州刺史

十國春秋吳列傳

臺濠字頂雲合肥人或言前趙特進臺彥皋之後也初從太祖起廬州下廣陵驍勇善戰積功至泗州防禦使龍紀初



董昌作亂唐命鎮海節度使錢鏐討之昌求救于太祖太祖遣濠攻蘇州以牽其師久之遷漣水制置使會田頔變作太祖檄李神福自鄂州東下別遣濠將兵應之頔聞濠至自將步騎逆戰覘者言濠兵營寨褊小裁可容二千人頔易之不復徵外兵濠入頔境番陳而進營壘俱按規度軍中或笑其怯濠曰頔宿將未易忽也不可不備居無何與頔遇于廣德濠以頔麾下皆太祖故時部曲可以計取陽出太祖書徧賜頔將頔將果下馬拜受濠乘其挫伏縱兵擊之頔兵遂敗走已又戰于黃池濠先爲三覆以待兵交濠僞走頔以爲實怯追之伏發大敗倉卒還宣州城守濠隨引兵圍之頔率敢死士數百出戰濠復陽示弱頔

兵踰濠而闕濠亟擊之頽奔回橋陷馬蹟濠就斬頽頽衆  
大潰遂克宣州以功表授檢校太保宣州觀察使天祐元  
年八月卒于官

十國春秋吳列傳

李友合肥人太祖起淮南友隸戲下有膽勇善撫士卒大順  
元年將兵二萬屯青城略地常州已進拔蘇州走浙將沈  
榮爭先排陳勇冠一軍遷尙書蘇州刺史無何孫儒陷蘇  
州友見殺贈太保

十國春秋吳列傳

王綰合肥人仕太祖爲漣水防遏使遷海州副使天復中青  
州王師範以沂密叛來乞師太祖遣臺濠及綰將兵援之  
已拔密州將進攻沂州謀者偵城中盡偃旗息鼓綰謂此  
不可擊也諸將堅欲攻之綰不能止乃設伏林間以待頽

之攻沂者果不克敵兵乘勢追之綽伏發得以濟師其用  
兵多此類武義元年加鎮東大將軍遷百勝軍節度使卒  
弟與初從周本攻危全諷臨戰本視賊水柵部分諸將指  
芴山頭一小營謂與曰爾往爲我取彼與唯唯不卽往本  
曰爾憚往邪與曰公必不以與爲不武請得此柵攻之舍  
而趣彼何爲本大喜曰爾亦知此爲必爭之地邪乃命之  
與乘輕舟襲破其前鋒遂排柵入諸軍繼進賊大潰積功  
遷至諸軍都虞候睿帝時出爲光州刺史進控鶴都虞候  
左宣威統軍歷鎮海節度留後金吾衛大將軍南唐禪代  
與從睿帝至潤州移鎮鄂州雅與監軍張廷堅不相得會  
廷堅被誣告有二志南唐先主遣使檄廷堅屬吏未至與

刺知之密告廷堅曰今可即日歸闕待罪毋與中使遇廷堅從其計獲免由是人推其長者中主時加同平章事保大二年卒年七十四

十國春秋吳列傳

王安廬州人少投吳武王爲親兵武王常升高冢望敵安捧匣器侍側左右皆注目前視陣旁有執槊者疾走徑趣王所左右驚惕失措安置匣器於地取弓射之一發而殪徐內弓破中復捧器如初顏色不變武王奇之曰汝有器度當富貴因加獎拔累遷袁州刺史歷興數郡皆以沈默寬厚爲理事烈祖爲神武統軍代李章爲虔州節度使卒年七十三

馬令南唐書

王稔廬州人也中和三年太祖爲廬州刺史開州人王勗賢

召欲用之固辭問其子弟曰子潛好學慎密可任以事弟子稔有氣節可爲將太祖因召潛置門下而以稔爲騎將後積功累官滁州刺史順義三年有言鍾泰章在壽州侵市官馬者睿帝命稔巡霍邱代泰章爲壽州團練使俄遷節度使未幾自壽州罷歸揚都爲統軍是年拜同平章事十國春秋異列傳

鍾泰章合肥人爲人勇敢有膽略烈祖時官左監門衛將軍高祖初襲位徐溫與張顥爭權欲刺顥而難於其人嚴可求語溫曰非鍾左衛不可溫乃使親將密諭泰章泰章私心喜選壯士三十輩椎牛享之夜刺血相飲爲誓溫猶疑其怯夜半止之曰僕母老懼事不成徐圖之如何泰章勃

然曰言已出口豈可已之明日遂誅顯未幾論誅叛功秦  
章賞獨薄或言秦章觖望溫曰是吾過也稍擢爲滁州刺  
史已而隨周本圍蘇州本敗于黃天蕩秦章將精兵三百  
爲殿多樹旗幟蔣中追兵不敢逼而還久之遷壽州團  
練使順義中人有告其僣帝官馬者知詰以王命遣王稔  
代之改秦章饒州刺史溫召至金陵使陳彥謙三詰之皆  
不對或謂秦章何不自辨秦章曰吾在揚州十萬軍中號  
稱壯士壽州去淮數里步騎不下五千苟有它志豈王稔  
單騎所能代乎我義不負國雖黜爲縣令亦行況刺史乎  
何爲自辨以彰朝廷之失時知詰欲以法繩諸將請收秦  
章治罪溫不可乃命以秦章次女配知詰長子是爲南唐

光穆皇后 十國春秋吳列傳

李章廬江人從吳武王爲騎將與朱瑾相悅瑾殺徐知訓自到義祖入誅瑾黨章與同事六人當斬五人已斬次至章厲聲曰四郊多壘而斬壯士耶時馬仁裕監斬壯其言聞于烈祖釋之已隸洪州爲軍校累遷雄武軍都虞候左街使章雖老而心尙壯善撫士卒勤于職務出爲百勝軍節度使爲理嚴重禁戢左右賓禮僚屬會周本卒移鎮廬州加中書令卒年九十 馬令南唐書

田頴字德臣廬州合肥人粗訥書傳沈果有大志與太祖生同里約爲兄弟應州募屯邊稍稍遷軍將太祖據廬州頴從之謀略爲多攻趙鏐于宜州鏐出東溪乘暴流以逸阻

水解甲謂追騎不能及頽乘輕船追之鎧驚遽見禽太祖  
表頽爲馬步軍都虞候孫儒略地南來頽屯丹陽備火揚  
州壁廣德頽破其屯與戰頽走太祖怒奪其兵或諫太祖  
曰強敵傳壘不用頽非計也太祖乃復將頽卒禽儒表頽  
爲宣州畱後已而授頽寧國軍節度使累遷檢校太保中  
書門下平章事頽已平馮宏鐸至揚州謝太祖左右求貲  
不已頽怒又求池歛爲巡屬不許頽始怨將還指府門曰  
吾不復入此是時兩浙將徐綰叛越王錢鏐入杭州逐綰  
綰屯靈隱山迎頽頽攻城急鏐於是遣其子傳鐸求昏於  
太祖且告之曰頽得志爲患必大請以子爲質願召還頽  
太祖使人謂頽曰不還我遣人代守宣州頽不從浙人輸



錢二百萬緡犒軍又請以王子元瓘出質頽乃與綰引兵還然內怨太祖遣使通好于梁王朱全忠全忠喜屯宿州須變天復三年頽與安仁義同舉兵反攻昇州太祖得檄趣臺濛曰人常告頽必反我不忍負人頽果負我吾思爲將者非公莫可濛頓首謝率騎渡江一戰于廣德再戰于黃池三戰于宣州城下橋陷頽爲濛所殺年四十六頽居恆畜死士數百人號曰爪牙都所向無前得其死力又善爲治通利商賈民愛之尤善遇士以是杜荀鶴等多爲之用十國春秋吳列傳

朱延壽舒城人事太祖破秦彥畢師鐸趙鐸孫儒功居多壽州刺史高彥溫舉州降于汴太祖襲之詰將圍城堅不可

拔延壽一鼓而拔其城卽表爲淮南節度副使汴兵猶屯  
壽春延壽以新軍出每旗五位爲列命黑雲都隊長李厚  
將十旗擊西偏不勝將斬之已又益五旗殊死戰汴兵引  
去於是取黃蘄光三州以功遷壽州團練使唐昭宗在鳳  
翔詔延壽圍蔡以分汴人之勢擢奉國軍節度使汴兵每  
至延壽境延壽開門不設備而不敢逼延壽用法嚴常以  
寡鬪衆不勝反者必盡戮之一日與汴人戰遣二百人持  
大劍砍陳有一人應畱者請行延壽以違命立斬焉田頰  
之叛遣使詣延壽布腹心延壽陰約曰公有所爲我願執  
鞭願與安仁義及延壽謀絕太祖太祖心疑之召延壽至  
刺殺之

十國春秋吳列傳

王景仁廬州合肥人也初名茂章少從楊行密起淮南爲將  
驍勇剛悍質略無威儀臨敵務以身先士卒行密壯之梁  
太祖遣子友寧攻王師範于青州師範乞兵行密遣景仁  
以步騎七千救師範師範以兵背城爲兩柵友寧夜擊其  
一柵柵中告急趣景仁出戰景仁按兵不動友寧已破一  
柵連戰不已遲明景仁度友寧兵已困乃出戰大敗之遂  
斬友寧是時梁太祖方攻鄆聞友寧死以兵二十萬倍道  
而至景仁閉壘示怯伺梁兵怠毀柵而出驅馳疾戰戰酣  
退坐召諸將飲酒已而復戰太祖登高望見之得青州降  
人問飲酒者爲誰曰王茂章也太祖歎曰使吾得此人爲  
將天下不足平矣後行密死于渚自宣州入立以景仁代

守宣州渥已立反求宣州故時物景仁惜不與渥怒以兵  
攻之景仁奔于錢鏐鏐表景仁領宣州節度使梁太祖素  
識景仁乃遣人召之景仁開道歸梁仍以爲寧國軍節度  
使加同中書門下平章事久之未召以用使參宰相班奉  
朝請而已開平四年以爲北面招討使將韓勣李思安等  
伐趙及晉人戰大敗于柏鄉景仁歸訴于太祖太祖曰吾  
亦知之蓋韓勣李思安輕汝爲客而不受節度爾末帝立  
以景仁爲淮南招討使使攻廬壽軍過獨山山有楊行密  
祠景仁再拜號泣而去戰于霍山梁兵敗走景仁殿而力  
戰以故梁兵不甚敗景仁歸京師病疽卒贈太尉

五代史

梁臣傳

宋

劉虎字伯林廬州梁縣人父以上五世同居孝友雍穆虎起  
農家隸軍籍四明趙善湘來帥淮西一見偉之留帳下嘉  
定十五年授安豐戰賈雞山陳村漕口斬首六百級獲二  
統軍千戶十三人寶慶二年賊紅衲襖擾山陽以偏師敗  
之三年戰盱楚漣海間大小捷三十有七於劉伶臺手射  
貫銀甲冑者應弦而仆寶沒揚戛統軍云紹定四年復鹽  
城淮安敗金將於盱眙攻泗州捷無虛日擢鎮江副都統  
制措置邊面仍總轄淮陰水陸軍馬時元兵水陸並進虎  
師於五河率勇士乘風縱火焚之北兵敗績會划車弩發  
中矢洞腹達背閻紀復甦指授諸將方略意氣彌厲擒阿

兪魯等十將三年援壽春自三月至五月晝耀兵夜斫營  
戰百餘合焚其壁壘解圍奏凱理宗命賜金帶金綾袍進  
利州觀察使明年召除帶御器械拜合肥郡侯寶祐元年  
知泰州繕城浚隍恆若敵至中箭毒發請歸卒兄海從弟  
師勇師雄師賢皆爲名將

康熙志